



Vogošća, ul. Jošanička br. 80, tel: 00387 33 586 412, 586-407

Broj: 12-04-sl./26

Vogošća, 26.05.2026. godine

VIJEĆNIČKA PITANJA
POSTAVLJENA NA 18. REDOVNOJ SJEDNICI OPĆINSKOG VIJEĆA VOGOŠĆA
održanoj 26.05.2026. godine

Na 18. redovnoj sjednici Općinskog vijeća vijećnik **Šabić Dalia (u ime Kluba vijećnika DF)** postavila je slijedeće vijećničko pitanje:

18/1. U ime građana ulice Samira Gradišića postavljam pitanje nadležnoj općinskoj službi koje glasi: da li postoji mogućnost pronalaska privremenog rješenja za problem parking prostora u ovoj ulici do realizacije planirane rekonstrukcije ulice. Naime, stanovnici navedene ulice već duži period imaju ozbiljne probleme s nedostatkom parking prostora, a situacija je u posljednje vrijeme dodatno eskalirala zbog svakodnevnog kažnjavanja građana za parkirana vozila. Građani ističu da se nalaze u veoma teškoj situaciji, jer praktično nemaju adekvatnu alternativu za parkiranje. S obzirom na to da je, prema dostupnim informacijama, rekonstrukcija ulice planirana u narednom periodu, postavlja se pitanje da li postoji mogućnost da se do konačne rekonstrukcije razmotri privremeno rješenje, poput uspostavljanja jednosmjernog režima saobraćaja ili nekog drugog modela koji bi olakšao svakodnevni život stanovnika ove ulice. Smatramo da građani ne trebaju snositi posljedice dugogodišnjeg infrastrukturnog problema za koji nisu odgovorni, te da je potrebno pokušati pronaći privremeno i funkcionalno rješenje do trajnog uređenja ove saobraćajnice. Posebno ističemo da u ovoj ulici živi veliki broj porodica, starijih osoba, kao i boračke populacije, uključujući ratne vojne invalide i demobilisane borce, zbog čega ovaj problem dodatno dobija na značaju. Zbog hitnosti i svakodnevnog karaktera problema, molim nadležnu službu da, ukoliko je moguće, dobijemo odgovor usmeno na ovoj sjednici Općinskog vijeća.

Vijećnik **Gluhović Alije (u ime Kluba vijećnika Naprijed BiH)** postavio je slijedeće vijećničko pitanje:

18/2. Postavljam vijećničko pitanje nadležnoj općinskoj službi za dostavljanje sljedećih informacija, a vezanih za stavke iz prečišćenog plana nabavki za 2026. godinu:

- Stavka broj 15. „Nabavka i isporuka kancelarijskog namještaja za potrebe Općine Vogošća“, iznos 91.540,00 KM.
- Stavka broj 20. „Nabavka i isporuka putničkih vozila za potrebe Općine Vogošća“, iznos 85.470,00 KM.
- Stavka broj 23. „Usluge medijskog praćenja aktivnosti i informisanja o radu Općine Vogošća“, iznos 37.350,00 KM
- Stavka broj 92. „Unapređenje sistema za upravljanje dokumentima sa uslugom održavanja icloud infrastrukturom“, iznos 251.000,00 KM.

Molim nadležnu Općinsku službu da mi dostavi precizne podatke o ovim nabavkama, njihovim neophodnim potrebama kao i sve druge relevantne informacije o istim, a koje se tiču njihove opravdanosti.

Vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

18/3. Evidentno je da veći broj djece koji se bave atletikom koriste tartan stazu za upražnjavanje i uvježbavanje sportskih aktivnosti na stadionu „Hakija Mršo“ vezane za trčanje. Međutim, usljed nepoznatog uzroka došlo je do oštećenja tartan staze na više mjesta u vidu rupa nepravilnog oblika koje se vremenom šire, što može prouzrokovati povrede kod djece uslijed trčanja po neravninama i udubljenjima koja su nastala na tartan stazi. Potrebno je da nadležna služba izvrši popravke tartan staze kako ne bi nastupile neželjene posljedice.

18/4. Postavljam pitanje prema nadležnoj općinskoj službi da nam se odgovori iz kojih razloga djeca malonogometnih klubova sa područja općine Vogošća ne mogu koristiti stadion „Hakija Mršo“, kao što to koriste djeca koja treniraju u Fudbalskom klubu „UNIS“. Da li za navedeno postoji neki propis koji to reguliše ili se možda radi o postupku koji diskriminira ostalu djecu, s obzirom da je stadion javno dobro koje bi trebalo da koriste sva djeca koja se bave treniranjem fudbala pod jednakim uslovima. Roditelji djece drugih malonogometnih klubova su voljni plaćati sve što je potrebno za trening njihove djece, te postavljaju pitanje zašto im se to ne dozvoli, jer se oni i njihova djeca osjećaju u neravnopravnom položaju vezano za navedeno pitanje.

Vijećnik **Pašagić Almir (u ime Kluba vijećnika SDP)** postavio je slijedeća vijećnička pitanja:

18/5. Postavljam pitanje nadležnim službama u vezi sa višegodišnjim nedovršenim, napuštenim i neosiguranim objektom (gradilištem) koji se nalazi u ulici Rašida Bešlije u Hotonju, u neposrednoj blizini proizvodnog pogona fabrike „OMC“. S obzirom na to da se ovaj objekat nalazi u zoni povećane frekvencije teretnog i putničkog saobraćaja zbog poslovanja obližnjih privrednih subjekata, a da je betonska konstrukcija potpuno nezaštićena i prepuštena propadanju, molim vas da mi dostavite sljedeće pismene informacije:

1. Ko je zvanični vlasnik parcele i investitor ovog objekta, te da li je za isti ikada izdata pravosnažna građevinska dozvola.
2. Da li je urbanističko-građevinska inspekcija Općine Vogošća vršila nadzor nad ovim lokalitetom i koji je tačan pravni status ovog gradilišta (da li postoji rješenje o zabrani gradnje ili je investitor obustavio radove samoinicijativno).

18/6. Postavljam pitanje Općinskom načelniku i nadležnoj Službi za urbanizam, prostorno planiranje i imovinsko-pravne poslove:

1. U kojoj je tačno fazi rješavanje imovinsko-pravnih odnosa i eksproprijacija stambenih i poslovnih objekata na dionici Prve transverzale od izlaza iz tunela Kobilja Glava (Hotonj) do spoja sa autoputem (Jošanička petlja).
2. Koliko je objekata na ovoj poddionici do danas potpuno pravno riješeno i otkupljeno, a za koliko objekata se tek vodi ili pokreće postupak eksproprijacije.
3. S obzirom na to da su Ceste Federacije BiH preuzele obavezu projektovanja i finansiranja ove dionice, da li je Zavod za izgradnju Kantona Sarajevo dostavio Općini Vogošća konačan elaborat eksproprijacije zasnovan na Glavnom projektu, kako bi se spriječila daljnja kašnjenja u rješavanju uskih grla koja uzrokuju svakodnevni saobraćajni kolaps.

Vijećnik **Škoro Hamdija (u ime Kluba vijećnika Naprijed BiH)** postavio je slijedeće vijećničko pitanje:

18/7. Postavljam vijećničko pitanje nadležnoj općinskoj službi za dostavljanje sljedećih informacija:

- Koja putnička vozila je nabavila Općina Vogošća u periodu od 2022. godine do danas.
- Koja je tačna plaćena cijena tih vozila (svako vozilo posebno navesti).
- Za potrebe kojih službi i pojedinaca je Općina nabavila ta vozila.
- Planira li Općina nabavku vozila u 2026. godini.

Molim da mi tačne i precizne podatke o ovim informacijama dostavite u što kraćem periodu.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

18/8. U kojoj fazi realizacije se nalazi usvojena inicijativa za uspostavu Zdravstvenog savjeta Općine kao stalnog stručnog savjetodavnog tijela i kada se može očekivati njena konačna implementacija.

Obrazloženje:

Na 14. redovnoj sjednici Općinskog vijeća uputio sam inicijativu za uspostavu Zdravstvenog savjeta Općine, koja je od strane Općinskog vijeća usvojena. Od usvajanja inicijative proteklo je približno četiri mjeseca, međutim do danas vijećnici i javnost nisu informisani o konkretnim aktivnostima poduzetim na njenoj realizaciji. S obzirom na značaj uspostave Zdravstvenog savjeta kao stalnog stručnog i savjetodavnog tijela koje bi pratilo stanje u oblasti zdravstvene zaštite, davalo prijedloge i doprinosilo unapređenju zdravstvenih usluga na području općine, smatram važnim da Općinsko vijeće dobije informaciju o trenutnom statusu realizacije ove inicijative. Posebno naglašavam da je uspostava Zdravstvenog savjeta zakonska obaveza

propisana važećim propisima, te je neophodno poduzeti potrebne aktivnosti kako bi se ista realizovala u razumnom roku. Stoga tražim informaciju:

- koje su aktivnosti do sada poduzete na realizaciji inicijative,
- te kada se može očekivati završetak procedure i početak rada ovog tijela.

18/9. Da li je u okviru planirane akcije proljetnog čišćenja na području općine Vogošća, zakazane za 23.05.2026. godine, obuhvaćena i prijavljena divlja deponija koja se nalazi u ulici Donja Jošanica II, kod broja 2.

Obrazloženje:

Povodom planirane proljetne akcije čišćenja na području općine Vogošća, a imajući u vidu da je u planiranim aktivnostima predviđeno i uklanjanje divljih deponija, obraćam se zbog velikog broja upita građana koji su izrazili zabrinutost zbog nelegalne deponije otpada na navedenoj lokaciji. Radi se o lokaciji u ulici Donja Jošanica II, kod broja 2, na prvoj raskrsnici ulice, između objekta „Likval“ i crkve, iza trafostanice Elektroprivrede, u neposrednoj blizini znaka zabrane odlaganja otpada. Na toj lokaciji odložene su velike količine otpada, uključujući sitni i kabasti otpad, gume, namještaj i drugi otpadni materijal. Zbog položaja same lokacije, koja je obrasla rastinjem i nije lako uočljiva prolaznicima niti komunalnim službama, pogodna je za dalje nelegalno odlaganje otpada. Građani također navode da se sa navedene lokacije često širi neugodan miris, te da se pojavljuju glodari koji predstavljaju potencijalnu opasnost po zdravlje stanovništva. S obzirom da je riječ o frekventnom dijelu naselja kojim svakodnevno prolazi veliki broj pješaka, molim da mi se dostavi informacija da li je navedena lokacija obuhvaćena akcijom proljetnog čišćenja i da li je od strane nadležne mjesne zajednice prijavljena kao divlja deponija. Ukoliko navedena lokacija nije obuhvaćena planiranim aktivnostima, molim informaciju o daljnjim koracima kako bi se mogla podnijeti inicijativa za njeno hitno uklanjanje.

Vijećnik **Handžić Jasmin (u ime Kluba vijećnika SDA)** postavio je slijedeća vijećnička pitanja:

18/10. Pitanje upućujem Cestama Federacije Bosne i Hercegovine i Direkciji za puteve Kantona Sarajevo koje glasi: Da li su Ceste Federacije Bosne i Hercegovine i Direkcija za puteve Kantona Sarajevo upoznate sa izuzetno lošim stanjem saobraćajnice na kružnom toku koji se nalazi neposredno iza naplatnih kućica, tj. naselje Krivoglavci, imajući u vidu da se radi o jednoj od najfrekventnijih saobraćajnica u Bosni i Hercegovini. Također, da li je u planu sanacija navedene saobraćajnice tokom 2026. godine, te ukoliko jeste, u kojem vremenskom periodu se očekuje realizacija radova.

18/11. Postavljam pitanje prema Ministarstvu privrede Kantona Sarajevo koje glasi: Kada Ministarstvo privrede Kantona Sarajevo planira izvršiti doznaku sredstava Općini Vogošća po osnovu prikupljenih prihoda od vodnih naknada, obzirom da bi eventualno kašnjenje u doznačavanju sredstava moglo negativno uticati na pravovremenu realizaciju planiranih projekata, posebno uzimajući u obzir trajanje građevinske sezone i moguće vremenske neprilike. Također, imajući u vidu da se nalazimo u mjesecu maju, te da postupci javnih nabavki, provođenje procedura i uvođenje izvođača u posao zahtijevaju značajan vremenski period.

Vijećnica **Kobiljak Elvedina (u ime Kluba vijećnika SDA)** postavila je slijedeće vijećničko pitanje:

18/12. Postavljam pitanje nadležnoj općinskoj službi da li Općina ima u planu raditi sanaciju oštećenja, odnosno rekonstrukciju i uređenje trotoara u ulici Jošanička. Na trotoarima u ulici Jošanička jasno su vidljiva oštećenja (neravnine) betonskih kocki kojima su urađeni trotoari što otežava sigurno kretanje pješaka, posebno invalida, starijih osoba kao i roditelja sa dječijim kolicima.

Vijećnica **Curić Samira (u ime Kluba vijećnika SDP)** postavila je slijedeće vijećničko pitanje:

18/13. Postavljam pitanje nadležnoj općinskoj službi i KJKP „Rad“ d.o.o. Sarajevo: Kada će stanovnici naselja Tihovići dobiti crne i žute kante za odvojeno prikupljanje otpada za svako domaćinstvo, imajući u vidu da su brojna naselja na području Općine već obuhvaćena ovim projektom podjele kanti. Građani Tihovića ističu da su među rijetkim stanovnicima općine koji još uvijek nisu dobili kante za selektivno odlaganje otpada, zbog čega su dovedeni u neravnotežan položaj u odnosu na ostala naselja. Također, nedostatak adekvatnih posuda

za odlaganje otpada otežava pravilno razvrstavanje smeća i održavanje čistoće naselja. Molim da se dostavi informacija: da li je planirana podjela kanti za domaćinstva u Tihovićima, u kojem vremenskom periodu bi se ista mogla realizovati, te koji su razlozi zbog kojih ovo naselje do sada nije obuhvaćeno projektom podjele crnih i žutih kanti za otpad.

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

18/14. Da li je moguće nastaviti sa redovnim održavanjem prostora oko Bunkerskog mosta, imajući u vidu da se radi o historijskom spomeniku. Molim nadležne službe da dostave informaciju o planu održavanja i zaštite ovog lokaliteta, kao i o eventualnim administrativnim ili pravnim preprekama za provođenje redovnog održavanja.

18/15. Da li se planira započeti sa aktivnostima na uređenju i uklanjanju niskog i visokog rastinja uz saobraćajnice, pješačke staze i javne površine, s ciljem poboljšanja preglednosti, sigurnosti učesnika u saobraćaju i urednijeg izgleda naselja na području čitave Opštine (npr. lokacije Semizovac, Svrake, Ljubina, Donja Vogošća itd.).

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./26

Vogošća, 28.05.2026.godine

**INICIJATIVE POKRENUTE
NA 18. REDOVNOJ SJEDNICI OPĆINSKOG VIJEĆA VOGOŠĆA
održanoj 26.05.2026. godine**

Na 18. redovnoj sjednici Općinskog vijeća vijećnik **Šabić Dalia (u ime Kluba vijećnika DF)** pokrenula je slijedeću inicijativu:

18/1. Pokrećem inicijativu prema nadležnoj općinskoj službi za postavljanje rukohvata sa obje strane trotoara na raskrsnici ulica Mitra Šućura i Hotonj IV, kod broja 2, u naselju Bašta – Hotonj.

Obrazloženje:

Na navedenoj lokaciji nalazi se izrazito strma raskrsnica sa velikim nagibom, a postojeći trotoar je veoma uzak, što dodatno otežava sigurno kretanje pješaka. Poseban problem nastaje tokom zimskog perioda, kada usljed poledice i snijega često dolazi do padova i povreda građana. Prema navodima stanovnika ovog dijela naselja, na ovoj lokaciji zabilježen je veliki broj padova, uganuća i lomova upravo zbog nepostojanja adekvatnih rukohvata koji bi građanima omogućili sigurnije kretanje. S obzirom da ovu dionicu svakodnevno koriste starije osobe, djeca, učenici i drugi pješaci, smatramo da je neophodno postaviti rukohvate sa obje strane trotoara, barem na dijelu gdje je nagib ceste najveći, kako bi se povećala sigurnost i spriječile buduće povrede. Molim nadležnu službu da izvrši uviđaj na terenu i u što kraćem roku pristupi realizaciji ove inicijative.

Vijećnik **Selimović Bego (u ime Kluba vijećnika SDA)** pokrenuo je slijedeću inicijativu:

18/2. Pokrećem inicijativu da se na mostu preko rijeke Bosne u ul. Svrake I u naselju Svrake koji predstavlja glavni ulaz u naselje, zbog nedovoljne širine kolovoza za dvosmjerni saobraćaj, izvrši postavljanje adekvatne saobraćajne signalizacije, kojom će se regulisati prvenstvo prolaza. Na ovaj način bi se odredilo iz kojeg smjera je obavezno zaustaviti vozilo prije mosta i propustiti drugo koje se kreće iz suprotnog smjera, odnosno smjera sa prvenstvom prolaza.

Vijećnik **Gluhović Alija (u ime Kluba vijećnika Naprijed BiH)** pokrenuo je slijedeću inicijativu:

18/3. U skladu sa zahtjevima građana u ulici Samira Gradišića, a koji su poslani na adresu Općine Vogošća i Općinskog načelnika pokrećem inicijativu u ime istih da se u ulici Sarmira Gradišića privremeno uvede jednosmjerni saobraćaj postavljanjem adekvatnih saobraćajnih znakova.

Obrazloženje:

Kao što ste i upoznati već duži niz godina zbog povećanog broja automobila stanara ove ulice, kao i dotrajele i loše infrastrukture u istoj, građani se susreću sa velikim problemom parkinga ali i drugih pojava, kao što je nesmetano odvijanje saobraćaja, kretanja pješaka itd. Rješavanjem i prihvatanjem ove inicijative do konačne rekonstrukcije ove ulice, riješili bi trenutne izazove građana ulice Samira Gradišića. Stoga molim nadležnu službu za hitno postupanje.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

18/4. Pokrećem inicijativu prema nadležnoj općinskoj službi, za dodijelu novčane pomoći nastavniku i učenicima OŠ „Mirsad Prnjavorac“ i OŠ „Porodice ef. Ramić“ za učešće na međunarodnom takmičenju iz engleskog jezika u Italiju.

Obrazloženje:

Pet učenika OŠ "Mirsad Prnjavorac" i OŠ „Porodice ef. Ramić“ ostvarilo je zapažene rezultate na međunarodnom takmičenju iz stranih jezika. U saradnji sa nastavnikom engleskog jezika prijavili su se na međunarodno takmičenje koje je održano u mjestu Lido di Jesolo u Italiji, gdje su predstavljali našu lokalnu zajednicu, kao i državu Bosnu i Hercegovinu i izborili evropsko polufinale. Međutim, ni nastavnik ni učenici do sada nisu dobili odgovarajuću podršku i pomoć nadležnih institucija u vezi sa pokrivanjem troškova učešća, iako su na navedenom takmičenju predstavljati Bosnu i Hercegovinu i ostvarili zavidne rezultate. U vezi s navedenim, pokrećem inicijativu da nadležna općinska služba obezbijedi novčanu pomoć nastavniku i učenicima OŠ "Mirsad Prnjavorac" i OŠ „Porodice ef. Ramić“, kako bi im se omogućilo sufinansiranje troškova učešća na navedenom takmičenju gdje su predstavljali našu lokalne zajednicu i državu.

- 18/5.** Pokrećem inicijativu prema nadležnom Ministarstvu saobraćaja i Direkciji za puteve Kantona Sarajevo, a u vezi sa postavljanjem potrebne saobraćajne signalizacije radi obilježavanja pješačkog prelaza i ograničenja brzine u ulici Igmanska, na dionici između zgrade Općine Vogošća, Policijske uprave Vogošća i Doma zdravlja Vogošća.

Obrazloženje:

Pješački prelaz u ulici Igmanska, koji se nalazi između ključnih institucija Općine Vogošća, Policijske uprave Vogošća s jedne strane, te Doma zdravlja i apoteke s druge strane, nije adekvatno obilježen signalizacijom za upozorenje vozača, niti opremljen adekvatnom opremom i uređajima za smanjenje brzine kretanja motornih vozila. Na navedenom pješačkom prelazu dogodilo se više saobraćajnih nezgoda u kojima su pješaci zadobili teške povrede, a bilo je i smrtnih slučajeva. S tim u vezi, neophodno je da ovlaštena lica nadležnih službi izvrše uvid na licu mjesta, te predlože i postave odgovarajuću signalizaciju, znakove upozorenja, ograničenja i opasnosti, kao i opremu za usporavanje brzine kretanja vozila. Time bi se vozači pravovremeno upozorili na frekventan pješački prijelaz koji povezuje naselja, a svakodnevno ga koriste i djeca prilikom odlaska i povratka iz škole. Postavljanje potrebne signalizacije i znakova značajno bi doprinijelo povećanju sigurnosti pješaka, posebno djece, te smanjenju rizika od saobraćajnih nezgoda na ovom lokalitetu.

Vijećnik **Pašagić Almir (u ime Kluba vijećnika SDP)** pokrenuo je slijedeću inicijativu:

- 18/6.** Pokrećem inicijativu za izgradnju mreže od devet multifunkcionalnih elektro punionica s pratećim sadržajima (dragstor i praonica) koja je u svakoj općini Kantona Sarajevo je strateški bitna za razvoj infrastrukture. S obzirom na to da Elektroprivreda BiH (EPBiH) već provodi projekt "Elektromobilnost u EPBiH", inicijativa se upućuje direktno njima ili preko resornih ministarstava Kantona Sarajevo. Prijedlog inicijative: Inicijativa za uspostavu mreže multifunkcionalnih elektro punionica u Kantonu Sarajevo. U skladu s ciljevima energetske tranzicije i smanjenja emisija CO₂ u urbanim sredinama, podnosim inicijativu za izgradnju devet (9) savremenih elektro punionica na području Kantona Sarajevo, strateški raspoređenih u svakoj od devet općina (Stari Grad, Centar, Novo Sarajevo, Novi Grad, Ilidža, Vogošća, Hadžići, Ilijaš i Trnovo). Predlaže se da svaka lokacija obuhvata:

1. Ultra-brze DC punjače (minimalno 150 kW) za efikasno punjenje električnih vozila.
2. Samouslužni dragstor (24/7), prilagođen potrebama vozača tokom čekanja.
3. Ekološku samouslužnu praonicu vozila.

Obrazloženje:

Trenutna infrastruktura punionica u BiH prepoznata je kao glavna kočnica razvoju elektromobilnosti. Realizacijom ovog projekta, Kanton Sarajevo bi postao lider u zelenoj mobilnosti u regionu, pružajući korisnicima kompletnu uslugu na jednoj lokaciji. Ovakav koncept povećava komercijalnu održivost punionica kroz dodatne usluge (trgovina i pranje). Kome i kako uputiti inicijativu.

1. JP Elektroprivreda BiH d.d. — Sarajevo

Odjel: Stručni tim za elektromobilnost.

Email: punionice@epbih.ba.

Zašto: Oni su investitori i operatori većine javnih punionica u BiH.

2. Ministarstvo saobraćaja Kantona Sarajevo

Svrha: Traženje podrške za lokacijske uslove i uključivanje u Program javnih investicija (PJI).

Email: ms@ms.ks.gov.ba.

3. Vlada Kantona Sarajevo

Iniciranje međuresorne saradnje između općina i elektrodistribucije radi lakšeg dobijanja dozvola. Kanton Sarajevo je već najavio planove za pojednostavljenje izdavanja građevinskih dozvola za punionice, što je idealna prilika.

1. Procjena investicionih troškova (po jednoj lokaciji)

Na osnovu trenutnih tržišnih cijena (2025/2026), okvirna investicija po jednoj općinskoj lokaciji iznosi.

STAVKA	OPIS	PROCJENA (KM)
Elektro punjač	Ultra-brzi DC punjač (150 kW) sa dva priključka	60.000,00 - 100.000,00
Povezivanje	Trafostanica i priključak na mrežu (zavisno od lokacije)	40.000,00 - 70.000,00
Samouslužna praonica	2-3 boksa sa kompletnom opremom	80.000,00 - 120.000,00
Dragstor/Objekat	Modularni objekat (cca. 30-50 m ²) sa opremanjem	50.000,00 - 80.000,00
Zemljište i dozvole	Priprema terena, asfaltiranje i takse	30.000,00 - 50.000,00
UKUPNO po lokaciji		260.000,00 - 420.000,00

Ukupna investicija za svih 9 općina iznosi cca 2,5 — 3,8 miliona KM.

2. Analiza isplativosti (ROI)

Projektovan je povrat investicije u periodu od 5 do 7 godina, zavisno od frekvencije saobraćaja, kroz tri izvora prihoda:

1. Prihod od punjenja vozila: Naplata po kW/h ili minuti zauzimanja punjača. Cijene usluga u BiH su već regulisane internim aktima Elektroprivrede BiH.
2. Prihod od dragstora: Visoka marža na asortiman proizvoda koji vozači kupuju dok čekaju (prosječno čekanje na brzom punjaču je 20-30 min).
3. Prihod od praonice: Najstabilniji izvor prihoda sa niskim operativnim troškovima, koji privlači i vozače konvencionalnih automobila, čime lokacija postaje profitabilna od prvog dana.

3. Izvori finansiranja

- Vlastita sredstva EPBiH: Investicija u elektroenergetsku infrastrukturu.
- Fond za zaštitu okoliša F BiH: Sufinansiranje projekata energetske tranzicije (moguće do 40% bespovratnih sredstava).
- EU Fondovi: Kroz programe "Zelene agende za Zapadni Balkan" dostupni su grantovi za dekarbonizaciju transporta.
- Javno-privatno partnerstvo: Općina daje zemljište, EPBiH infrastrukturu, a privatni partner upravlja dragstorom i praonicom.

Prednosti za Kanton Sarajevo

- Ekološki uticaj: Drastično smanjenje aerozagađenja u centralnim općinama
- Turistički potencijal: Strani turisti koji putuju električnim vozilima trenutno izbjegavaju BiH zbog nedostatka brzih punjača.
- Radna mjesta: Direktno zapošljavanje minimalno 20-40 radnika (za rad u dragstorima u tri smjene), čuvari i serviseri.
- Većina taksista bi se odlučila za elektro, auta jer bi time imali osigurane punionice na svim područjima KANTONA SARAJEVO.

- 18/7.** Inicijativa "slomljeni cvjetovi" za izgradnju spomen-obilježja porodici ef. Hasiba Ramića u Semizovcu. Pokrećem inicijativu da Općina Vogošća, u saradnji sa relevantnim institucijama i udruženjima, pristupi projektu izgradnje spomen-obilježja porodici Ramić u naselju Semizovac.

Obrazloženje:

U maju 1993. godine, u Semizovcu je počinjen jedan od najmonstruoznijih zločina tokom agresije na Bosnu i Hercegovinu. Efendija Hasib Ramić, njegova supruga Šefika i njihovo četvero djece - Muhamed (13), Meliha (9), Ahmed (4) i bebica Amina (30 dana) - zvjerski su mučeni i zaklani na svom kućnom pragu od strane srpskih agresorskih snaga. Cilj ove inicijative je trajno očuvanje sjećanja na njihovu nevinost i žrtvu kroz umjetničko i memorijalno rješenje koje simbolizira prekinutu mladost i porodičnu tragediju. Prijedlog

izgleda spomenika: Spomenik treba biti izrađen od postojanog materijala (mermer ili bronza) sa specifičnom simbolikom. Simbolika idejnog rješenja: Spomenik treba biti dizajniran kroz motive "slomljenog cvijeća" koji nose duboku poruku:

Slomljeni karanfil: Predstavlja glavu porodice, efendiju Hasiba. Karanfil je ovdje simbol njegove ahmedije, časti i imamskog poziva koji je nosio do posljednjeg dana. Bijela boja karanfila sa centralnom crvenom bojom. Bijela simbolizira čistotu vjerske službe i ahmedije, dok crvena u sredini simbolizira mučeničku smrt (šehadet) glave porodice.

Slomljena ruža: Predstavlja majku Šerifu, stub porodice i simbol ljubavi. Slomljena ruža je crvene boje i ona simbolizuje majku Šerifu, njenu ljubav, požrtvovanost i prolivenu krv u pokušaju da zaštiti svoje gnijezdo.

Četiri slomljena pupoljka: Predstavljaju njihovo četvero djece, čiji su životi ugašeni prije nego što su stigli "procvjetati" Četiri slomljena pupoljka su zelene boje. Zelena boja simbolizira dženetske ptice - četvero djece (Muhameda, Melihu, Ahmeda i Aminu) čija je mladost bila u pupoljku i koja je nasilno prekinuta prije cvjetanja.

Lokacija:

Spomen-obilježje treba biti locirano na javnoj površini u centru Semizovca, neposredno uz kružni tok, kako bi bilo vidljivo svim građanima i putnicima namjernicima kao trajna opomena. Ovakvo rješenje spaja estetsku tugu sa jasnom identifikacijom žrtava, čuvajući sjećanje na njihovu plemenitost i stravičan kraj. Ovako dizajniran spomenik, sa jasno definisanim bojama, neće biti samo nijemi kamen, već vizuelna opomena koja na dostojanstven način oslikava identitet i stradanje ove porodice. Izgradnjom ovog spomenika, Semizovac i Općina Vogošća će dobiti dostojanstveno mjesto na kojem će se generacije učiti o razmjerama zločina i važnosti nezaborava. Inicijativa podrazumijeva iznalaženje lokacije u Semizovcu i osiguranje sredstava za realizaciju najkraćem mogućem roku.

Uloga institucija:

Država BiH i Federalna Vlada: Prepoznavanje ovog memorijala kao simbola stradanja bošnjačkog naroda i nedužne djece, te uvrštavanje u redovne programe obilježavanja bitnih datuma.

Vlada Kantona Sarajevo: Finansijska podrška putem Ministarstva za boračka pitanja i Ministarstva kulture.

Islamska zajednica u BiH: Stručni nadzor nad simbolikom (karanfil kao simbol ahmedije) i podrška u vjerskom dijelu memorijalizacije.

Općina Vogošća: Obezbjedivanje lokacije u centru Semizovca pored kružnog toka, izdavanje potrebnih dozvola i održavanje spomen-obilježja.

Zaključak:

Zajedničkim djelovanjem institucija, od lokalnog do državnog nivoa, osigurat ćemo da žrtva porodice Ramić postane trajni dio kolektivne memorije, na mjestu gdje se godinama gajila svrha da čovjek treba da bude dobar komšija, građanin, porodični i društveni čovjek i da ovaj primjer stradanja jedne porodice bude opomena svim narodima da istina treba da bude osveta zločinu i opomena da se nikad i nikome ne ponovi ovakav zločin u našoj domovini BOSNI I HERCEGOVINI.

Vijećnica **Džano Emina (u ime Kluba samostalnih vijećnika Bogilović-Džano)** pokrenula je slijedeću inicijativu:

- 18/8.** U posljednjem periodu Bosna i Hercegovina bilježi zabrinjavajući porast nasilja nad ženama i slučajeva femicida. Prema dostupnim podacima Agencije za ravnopravnost spolova BiH, od 2015. godine do danas u Bosni i Hercegovini ubijeno je više od 100 žena, dok je samo u periodu 2023–2024. godine ubijeno 35 žena, od čega čak 31 u Federaciji Bosne i Hercegovine. Posebno zabrinjava činjenica da su mnoge žrtve prethodno prijavljivale nasilje nadležnim institucijama, što dodatno otvara pitanje povjerenja građana u sistem zaštite. Nekada se nasilje nad ženama vezivalo za neobrazovane žene ili sredine udaljene od urbanih centara. Danas je jasno da nasilje nema ni obrazovanje, ni profesiju, ni adresu. Žrtve nasilja su žene različitih godina, obrazovanja, ekonomskog statusa i mjesta stanovanja. Nasilje se dešava u gradovima, institucijama, naseljima i porodicama koje spolja često djeluju potpuno uređeno i stabilno. Upravo zato ovaj problem više ne smijemo posmatrati kao privatni problem pojedinaca, nego kao ozbiljan društveni i sigurnosni problem cijele zajednice. Istovremeno, sve češće među građanima možemo čuti osjećaj da su izgubili povjerenje u institucije koje bi prve trebale pružiti zaštitu i podršku žrtvama nasilja. Građani imaju osjećaj da se reaguje tek kada bude prekasno, dok se prijave nasilja, prijetnje i upozorenja često ne shvataju dovoljno ozbiljno. Takav osjećaj nepovjerenja dodatno

obeshrabruje žrtve da prijave nasilje i zatraže pomoć. Smatram da lokalna zajednica mora poslati jasnu poruku da zaštita života i sigurnosti građana nema alternativu. Iz tog razloga upućujem inicijativu za donošenje lokalnih mjera prevencije nasilja nad ženama i femicida na području naše općine. Predlažem sljedeće mjere: Formiranje lokalnog koordinacionog tima za prevenciju nasilja nad ženama i nasilja u porodici, koji bi činili predstavnici: Policijske stanice, Centra za socijalni rad, Doma zdravlja, obrazovnih ustanova, nadležnih općinskih službi, te organizacija koje se bave zaštitom žena i porodice. Zadatak tima bio bi: koordinacija institucija, hitna razmjena informacija u rizičnim slučajevima, praćenje prijavljenih slučajeva nasilja, procjena rizika od ponavljanja nasilja i mogućeg femicida, te predlaganje preventivnih mjera. Finansiranje besplatne pravne i psihološke pomoći za žrtve nasilja kroz budžet općine, kako bi žene koje trpe nasilje imale dostupnu stručnu podršku, savjetovanje i pomoć pri ostvarivanju svojih prava. Pokretanje programa hitnog smještaja i pomoći žrtvama nasilja, kroz saradnju sa sigurnim kućama i nadležnim ustanovama, uključujući mogućnost privremenog finansiranja smještaja za žene i djecu koja se nalaze u opasnosti. Organizovanje edukativnih radionica i preventivnih kampanja u osnovnim i srednjim školama o prevenciji nasilja, zdravim međuljudskim odnosima, poštovanju, digitalnom nasilju, te prepoznavanju psihičkog i fizičkog nasilja. Uvođenje sistema hitnog postupanja u visokorizičnim slučajevima nasilja, posebno kada postoje ponovljene prijave nasilja, prijetnje smrću, zabrane prilaska, ili druge okolnosti koje ukazuju na povećan rizik od težih posljedica. Pokretanje javne kampanje pod sloganom: „Nasilje nije privatna stvar“ s ciljem podizanja svijesti građana o važnosti prijavljivanja nasilja i pružanja podrške žrtvama. Smatram da lokalna zajednica ima odgovornost da aktivno učestvuje u zaštiti života, sigurnosti i dostojanstva svojih građana. Ova inicijativa nije političko pitanje, već pitanje ljudske sigurnosti, odgovornosti i zaštite osnovnih prava. Naša obaveza je da djelujemo prije tragedije, a ne poslije nje. Molim nadležne službe i Općinsko vijeće da razmotre ovu inicijativu i poduzmu konkretne korake u njenoj realizaciji.

Vijećnica **Salčin Sabiha (u ime Kluba vijećnika SDA)** pokrenula je slijedeću inicijativu:

18/9. Pokrećem inicijativu nadležnoj općinskoj službi da u saradnji sa JU KSC Vogošća i osnovnim školama sa područja naše općine, nastavi i dodatno unaprijedi praksu organizovanja besplatnih filmskih projekcija za učenike osnovnih škola.

Obrazloženje:

Pozdravljam aktivnosti koje je Općina Vogošća, zajedno sa JU KSC Vogošća, realizovala kroz rekonstrukciju kino sale i organizaciju besplatnih projekcija filmova za učenike osnovnih škola, što predstavlja značajan doprinos unapređenju kulturnog i obrazovnog sadržaja za mlade. Smatram da je važno osigurati kontinuitet ovakvih aktivnosti, imajući u vidu značaj filma kao snažnog edukativnog sredstva koje doprinosi razvoju kritičkog mišljenja, kulturne svijesti i ukupnog obrazovanja učenika. U tom smislu, posebno ističem važnost da se u okviru budućih projekcija, u skladu sa finansijskim mogućnostima, planira prikazivanje domaćih filmskih ostvarenja koja obraduju teme iz historije, identiteta i kulturnog naslijeđa Bosne i Hercegovine, a koja su prepoznata i predstavljena na značajnim filmskim festivalima. Kontinuitet i unapređenje ovakvog programa doprinijeli bi jačanju svijesti mladih o vlastitom identitetu, te omogućili jednak pristup kvalitetnim kulturno-edukativnim sadržajima za sve učenike sa područja općine Vogošća.

Vijećnik **Gljiva Avdo (u ime Kluba vijećnika DF)** pokrenuo je slijedeću inicijativu:

18/10. Pokrećem inicijativu za postavljanje zaštitne ograde u naselju Svrake II.

Obrazloženje:

Pokrećem inicijativu prema nadležnoj općinskoj službi da se, ukoliko je moguće i u skladu sa tehničkim uslovima, izvrši postavljanje zaštitne ograde u naselju Svrake II, na dionici od kuće Mumala do obale rijeke Bosne, ili da se pronađe drugo adekvatno rješenje za zaštitu prostora ispod autoputa. Naime, prema navodima građana, u prethodnom periodu zabilježen je slučaj dolaska divljih svinja u naselje, što je izazvalo zabrinutost stanovnika ovog gusto naseljenog dijela Svrake. Građani smatraju da bi postavljanje zaštitne ograde ili druge odgovarajuće prepreke moglo pomoći u sprječavanju ponovnog ulaska životinja u naseljeno područje i mogućih neželjenih posljedica. S obzirom na blizinu stambenih objekata i svakodnevno prisustvo djece i stanovnika na ovom prostoru, predlažemo da nadležna služba izvrši uviđaj na terenu i razmotri mogućnosti trajnog i adekvatnog rješavanja ovog problema.

Vijećnik **Škoro Hamdija (u ime Kluba vijećnika Naprijed BiH)** pokrenuo je slijedeću inicijativu:

18/11. Pokrećem inicijativu za postavljanje kanti za odlaganje otpada u kraku ulice Braće Hasagić, koja vodi uz rijeku pa sve do Srednjoškolskog centra Vogošća.

Obrazloženje:

Ovu ulicu građani koriste kao šetnicu uz rijeku i već veliki broj građana gravitira u istoj, stoga je potrebno na više lokacija duž ceste uz rijeku postaviti kante za odlaganje otpada, kako se isti ne bi, kao što je sad slučaj nalazio po cesti.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

18/12. Pokrećem inicijativu za uspostavljanje i aktivaciju zvanične Viber zajednice namijenjene mladima sa područja općine Vogošća.

Obrazloženje:

Ovu inicijativu podnosim na osnovu izražene potrebe i zahtjeva velikog broja mladih ljudi sa područja općine Vogošća, koji su tokom održanog Dijaloga mladih sa predstavnicima lokalne vlasti iskazali potrebu za unapređenjem komunikacije između mladih i lokalne zajednice. Tokom razmjene mišljenja, jedan od ključnih problema koji su mladi istakli jeste nedovoljno razvijena i neefikasna komunikacija sa općinskim strukturama, kao i nedovoljna informisanost o projektima, javnim pozivima, aktivnostima, edukacijama, kulturnim i sportskim sadržajima, te drugim mogućnostima koje Općina pruža mladima. Kao pozitivan primjer dobre prakse naveden je komunikacijski kanal koji je uspostavila Općina Centar Sarajevo, a koji služi za pravovremeno informisanje mladih putem Viber zajednice. Smatram da bi i Općina Vogošća, koja već koristi određene digitalne kanale komunikacije, bez većih administrativnih i finansijskih poteškoća mogla uspostaviti poseban kanal namijenjen omladinskoj populaciji. Uspostavljanjem zvanične Viber zajednice za mlade omogućila bi se brža, jednostavnija i efikasnija komunikacija između Općine i mladih građana, povećala bi se informisanost i uključenost mladih u društvene procese, te dodatno ojačalo povjerenje i saradnja između lokalne zajednice i omladinske populacije.

18/13. Pokrećem inicijativu da se na zvaničnoj web stranici Općine Vogošća uspostavi poseban dio pod nazivom „Mladi u Općini Vogošća“

Obrazloženje:

Tokom aktivnosti „Dijalog mladih sa vlastima Općine Vogošća“, u razgovoru sa mladima identificiran je problem nedovoljne komunikacije i nedostatka pravovremenih informacija između mladih i Općine Vogošća. Kao jedan od prijedloga za prevazilaženje navedenog problema istaknuta je potreba uspostavljanja posebnog dijela na zvaničnoj web stranici Općine Vogošća koji bi bio namijenjen mladima, pod nazivom „Mladi u Općini Vogošća“. Navedeni dio web stranice mogao bi sadržavati:

- strategije i strateške dokumente koji se odnose na mlade,
- projekte i aktivnosti za mlade,
- javne pozive, konkurse i programe namijenjene mladima,
- informacije o edukacijama, stipendijama i drugim prilikama za mlade.

Kao primjer dobre prakse može se navesti Općina Centar Sarajevo, koja na svojoj zvaničnoj web stranici ima posebno izdvojen dio namijenjen mladima, čime je unaprijeđena komunikacija i informisanost mladih osoba. Smatram da realizacija ove inicijative ne iziskuje značajna finansijska sredstva, dok bi njen značaj za unapređenje komunikacije između mladih i lokalne zajednice bio višestruk. Također, mišljenja i prijedlozi mladih koji mogu doprinijeti boljoj povezanosti sa institucijama trebaju biti prioritet i predmet podrške.

Vijećnik **Handić Jasmin (u ime Kluba vijećnika SDA)** pokrenuo je slijedeće inicijative:

18/14. Pokrećem inicijativu prema nadležnoj službi za sanaciju ograde dječijeg igrališta u ulici Omladinska, zbog vidnih oštećenja i dotrajalosti pojedinih dijelova ograde koji predstavljaju sigurnosni rizik za djecu.

Obrazloženje:

Dječije igralište u ulici Omladinska svakodnevno koristi veliki broj djece i roditelja, a postojeća ograda je na više mjesta oštećena i dotrajala. Takvo stanje može dovesti do povreda djece, ali i dodatnog propadanja same infrastrukture igrališta. Sanacijom ograde

osigurala bi se sigurnost korisnika, uredio izgled prostora i omogućili kvalitetniji uslovi za boravak djece na otvorenom.

18/15. Pokrećem inicijativu prema Vladi Kantona Sarajevo i Ministarstvu uprave i pravde za izmjenu Zakona o porezu na promet nekretnina i poreza na naslijeđe i poklone u dijelu koji se odnosi na član 11. stav 2 i 3 koji definiše stopu poreza na promet po osnovu ugovora o doživotnom izdržavanju, a u cilju smanjenja stope poreza koja je prema zakonu definisana na način da porez na promet nekretninama po osnovu ugovora o doživotnom izdržavanju kada se vlasništvo stiče do smrti primatelja izdržavanja plaća po stopi od 10%, a porez na promet nekretninama po osnovu ugovora o doživotnom izdržavanju kada se vlasništvo stiče poslije smrti primatelja izdržavanja plaća se prema broju godina izdržavanja i to:

- a) kraće od tri godine izdržavanja 10%,
- b) od tri do četiri godine izdržavanja po stopi od 8%,
- c) od četiri do pet godina izdržavanja po stopi od 6%,
- d) od pet do šest godina izdržavanja po stopi od 4%,
- e) od šest do sedam godina po stopi od 2%,
- f) sedam i više godina izdržavanja po stopi od 0%.

Obrazloženje:

Pravni okvir koji definiše porez na promet nekretnina i porez na naslijeđe važno je unaprijediti na način koji će omogućiti da se nekretnine mogu steći i po osnovu ugovora o doživotnom izdržavanju bez enormne stope poreza koju bi plaćao primatelj izdržavanja. U tom smislu predlažem smanjenje stope oporezivanja kada se vlasništvo na nekretninama stiče na osnovu ugovora o doživotnom izdržavanju. Često se u praksi radi o slučajevima kada najbliži srodnici davaoca izdržavanja koji žive i ulažu u nekretninu koja je predmet sticanja prava vlasništva po osnovu ugovora o doživotnom izdržavanju, nakon smrti ostavioca neosnovano plaćaju veliku stopu poreza prema važećem zakonu

Vijećnik **Gljiva Eno (u ime Kluba vijećnika DF)** pokrenuo je slijedeću inicijativu:

18/16. Inicijativa za organizaciju sajma domaćih i poljoprivrednih proizvoda na području općine Vogošća.

Obrazloženje:

Pokrećem inicijativu prema nadležnoj općinskoj službi za organizaciju sajma domaćih i poljoprivrednih proizvoda na području općine Vogošća, koji bi se održavao u mjesecu septembru. Cilj ove inicijative je pružanje podrške domaćim proizvođačima i poljoprivrednicima sa područja naše općine kroz stvaranje prostora za promociju, prezentaciju i plasman njihovih proizvoda. Organizacijom ovakvog sajma omogućilo bi se jačanje lokalne poljoprivredne proizvodnje, promocija domaćih proizvoda i povezivanje proizvođača sa građanima i potencijalnim kupcima. Sajam bi, osim ekonomskog značaja, imao i društveni i turistički karakter, te bi doprinio promociji Vogošće, očuvanju domaće proizvodnje i afirmaciji vrijednih ljudi koji se bave poljoprivredom i proizvodnjom domaćih proizvoda. Smatramo da bi u organizaciju sajma, pored Općine Vogošća, bilo poželjno uključiti lokalna udruženja, poljoprivredne proizvođače, obrtnike i druge zainteresovane subjekte, kako bi manifestacija postala tradicionalna i prepoznatljiva. Predlažem da nadležna služba razmotri mogućnosti organizacije i planiranja sredstava za realizaciju ove inicijative u narednom periodu.

Vijećnica **Karović Amra (u ime Kluba vijećnika SDP)** pokrenula je slijedeću inicijativu:

18/17. Pokrećem inicijativu za postavljanje stacionarnog radara u ulici Igmanska, na dijelu magistralne ceste od glavne raskrsnice u Vogošći do semafora koji se nalazi prema uključenju u ulicu Tome Mendeša.

Obrazloženje:

Obzirom da na toj dionici postoji jedan pješački prelaz koji nije adekvatno signaliziran, česti su udesi i prekoračenje brzine. Na tom dijelu ulice djeca kao najranjiviji dio populacije često prelaze ulicu, čime se svakodnevno stvara opasnost od mogućih neželjenih događaja. Obzirom da se upravo prije par dana desio udes u kojem je dijete povrijeđeno, molim da se inicijativa shvati krajnje neophodnom. Inicijativu pokrećem prema Ministarstvu za unutrašnje poslove Kantona Sarajevo.

Vijećnik **Cvrk Ćamil (u ime Kluba vijećnika DF)** pokrenuo je slijedeću inicijativu:

18/18. Inicijativa prema Ministarstvu unutrašnjih poslova Kantona Sarajevo za uklanjanje neregistrovanih i napuštenih vozila sa javnih parking površina na području općine Vogošća
Obrazloženje:

Pokrećem inicijativu prema Ministarstvu unutrašnjih poslova Kantona Sarajevo i nadležnim službama da se izvrši identifikacija i uklanjanje neregistrovanih, tehnički neispravnih i napuštenih vozila sa javnih parking površina na području općine Vogošća. Naime, Općina Vogošća se već duži period suočava sa hroničnim nedostatkom parking prostora, posebno u urbanim i gusto naseljenim dijelovima općine. Dodatni problem predstavljaju vozila koja mjesecima, pa čak i godinama zauzimaju parking mjesta, a nisu registrovana niti su u funkciji, čime se značajno smanjuje broj raspoloživih parking mjesta za građane. S obzirom na svakodnevne pritužbe stanovnika zbog nedostatka parking prostora, smatramo da je neophodno pojačati nadzor nad ovakvim vozilima, izvršiti njihovu evidenciju i u skladu sa zakonskim propisima, ukloniti ih sa javnih površina i premjestiti na predviđena odlagališta. Realizacijom ove inicijative oslobodio bi se određeni broj parking mjesta, unaprijedio izgled javnih površina i olakšao svakodnevni život građana Vogošće. Molim nadležne institucije da razmotre ovu inicijativu i preduzmu aktivnosti u okviru svojih nadležnosti.

Vijećnica **Curić Samira (u ime Kluba vijećnika SDP)** pokrenula je slijedeće inicijative:

18/19. Pokrećem inicijativu prema nadležnoj općinskoj službi da se izvrši uređenje prostorija Mjesne zajednice Blagovac, s ciljem stvaranja adekvatnih uslova za rad i boravak građana koji svakodnevno koriste navedeni prostor.

Obrazloženje:

Naime, korisnici prostorija Mjesne zajednice ukazali su na potrebu poboljšanja osnovnih uslova u objektu, te posebno istakli sljedeće: obezbjeđenje priključka na gradsku vodovodnu mrežu, renoviranje postojećeg toaleta, te krećenje i osvježavanje prostorija mjesne zajednice. Prostorije mjesne zajednice koriste građani različitih starosnih skupina, udruženja i organizacije sa područja Blagovca, te je neophodno osigurati funkcionalan, uredan i higijenski adekvatan prostor za održavanje sastanaka, okupljanja i drugih društvenih aktivnosti. Molim nadležnu službu da izvrši uvid u stanje objekta, utvrdi potrebne radove i mogućnosti realizacije navedene inicijative.

18/20. Pokrećem inicijativu da nadležna općinska služba izvrši procjenu i odredi više adekvatnih lokacija za postavljanje klupa na području naselja Blagovac.

Obrazloženje:

Naselje Blagovac predstavlja veliko naselje u kojem svakodnevno cirkuliše veliki broj građana svih generacija. Posebno starije osobe, roditelji sa djecom, kao i ostali mještani koji svakodnevno pješače kroz naselje, nemaju dovoljno mjesta za kraći odmor tokom šetnje ili obavljanja svakodневnih obaveza. Postavljanjem klupa na više frekventnih i pogodnih lokacija značajno bi se unaprijedio kvalitet života građana, omogućio lakši i ugodniji boravak na otvorenom, te podstakle šetnje i druženje stanovništva. Predlaže se da nadležna služba, u saradnji sa mjesnom zajednicom i na osnovu stanja na terenu, odredi najpogodnije lokacije za postavljanje klupa, vodeći računa o frekventnosti kretanja građana i potrebama stanovništva. Molim nadležnu službu da razmotri ovu inicijativu i poduzme aktivnosti na njenoj realizaciji.

Vijećnik **Pašić Edin (u ime Kluba vijećnika SDA)** pokrenuo je slijedeću inicijativu:

18/21. Pokrećem inicijativu na zahtjev mještana ulice Branilaca Hotonja od br.174 do br.192 kao i mještana susjednog kraka prema Službi za investicije i komunalne poslove kao i prema KJKP „Vodovod i kanalizacija“ da se poduzmu određene radnje i aktivnosti u svrhu rješavanja problema fekalne kanalizacije.

Obrazloženje:

Zbog kontinuirane izgradnje individualnih stambenih objekata i višegodišnjeg problema sa neadekvatnom odvodnjom fekalne kanalizacije neophodno je iznaći rješenje problema kanalizacionog sistema za mještane navedenog kraka. U posljednje vrijeme problem sa kanalizacijom se dodatno usložnio zahtjevima vlasnika parcela kroz koje je trenutna kanalizacija odvedene, stoga je neophodno pristupiti iznalaženju nekog rješenja.

Vijećnik **Omerović Denis (u ime Kluba vijećnika SDP)** pokrenuo je slijedeće inicijative:

18/22. Pokrećem inicijativu za uređenje korita rijeke Bosne na području Donje Vogošće, u blizini željezničkog mosta.

Obrazloženje:

Na navedenoj lokaciji primjetno je nakupljanje otpada, rastinja i nanosa, što narušava izgled područja, predstavlja potencijalnu opasnost u slučaju povećanog vodostaja, te negativno utiče na životnu sredinu i sigurnost građana. Molim da se inicijativa razmotri i poduzmu potrebne aktivnosti u cilju zaštite okoliša, sigurnosti građana i uređenja ovog dijela lokalne zajednice.

18/23. Pokrećem inicijativu na zahtjev mještana prema nadležnim službama za postavljanje novih kontejnera u naseljima Ljubina i Poturovići.

Obrazloženje:

Stanovnici ovih naselja nisu dobili kante za odvoz otpada, a prema informacijama sa kojima raspolazem, iste neće ni dobiti jer kamioni za prikupljanje otpada ne mogu pristupiti pojedinim dijelovima naselja zbog konfiguracije i nepristupačnosti terena. Zbog toga su građani dovedeni u situaciju da otpad moraju odvoziti u Vogošću, što predstavlja veliki problem, posebno za starije stanovništvo i domaćinstva bez adekvatnog prevoza. Predlažem da nadležne službe izvrše procjenu mogućih lokacija i ponovo postavte kontejnere na mjestima gdje su ranije bili postavljeni, odnosno na pristupačnim lokacijama pri dnu naselja, kako bi se građanima omogućilo redovno i adekvatno odlaganje otpada i očuvala higijena i urednost naselja.

Vijećnik **Gljiva Bego (u ime Kluba vijećnika S BiH)** pokrenuo je slijedeću inicijativu:

18/24. Pokrećem inicijativu prema Vladi Kantona Sarajevo i Ministarstvu unutrašnjih poslova Kantona Sarajevo da Općinskom vijeću Vogošća dostave detaljnu informaciju o:

- postojećim lokacijama analitičkih kamera, video nadzora i radarskih sistema na području općine Vogošća,
- stepenu pokrivenosti ključnih saobraćajnica, raskrsnica, školskih zona i javnih površina sistemima sigurnosnog nadzora,
- planovima za proširenje mreže kamera i radarskih sistema na području općine Vogošća u narednom periodu.

Obrazloženje:

Općina Vogošća predstavlja jednu od najfrekventnijih općina u Kantonu Sarajevo, sa značajnim brojem vozila i svakodnevnim intenzivnim saobraćajem, posebno na magistralnim pravcima, kružnim tokovima, školskim zonama i gusto naseljenim područjima. U prethodnom periodu Vlada Kantona Sarajevo i MUP KS provodili su projekte instalacije analitičkih kamera i savremenih sistema nadzora na području Kantona Sarajevo, s ciljem povećanja sigurnosti građana, efikasnijeg nadzora saobraćaja, sprečavanja kriminaliteta i bržeg djelovanja nadležnih službi. Smatram da je potrebno da Općinsko vijeće Vogošća i građani budu upoznati sa postojećim stepenom sigurnosne pokrivenosti naše općine, kao i planovima budućih ulaganja u ovu oblast. Također, smatram da postoji potreba za dodatnim unapređenjem sistema sigurnosnog nadzora, posebno u blizini: školskih objekata, pješačkih prelaza, frekventnih raskrsnica, ulaza i izlaza iz općine, javnih površina i mjesta okupljanja građana. Molim da se inicijativa prosljedi Vladi Kantona Sarajevo i Ministarstvu unutrašnjih poslova Kantona Sarajevo na dalje postupanje.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir